

NESTRI SIGNÔR GJESÙ CRIST
RE DAL MONT INTÎR

Solenitât

Antifone di jentrade Ap 5,12; 1,6

L' Agnel ch'al è stât copât al merte di vê
potence e ricjece, sapience e fuarce e onôr:
a lui la glorie e la potence tai secui dai secui.

Si dñs Glorie a Diu.

Colete

Diu onipotent e eterni,
che tu âs volût tornâ a fâ dutis lis robis
in Crist, to Fi, Re dal mont intîr,
danus la gracie
che dute la creazion, sfrancjade de sclavitût,
e servissi la tô maiestât e ti laudi cence mai finî.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

Si dñs O crôt.

Su lis ufiertis

Ti ufrîn, Signôr, la vitime ch'e à riconciliât la gjernazie umane
e o preîn cun umiltât che to Fi
ur dedi a ducj i popui i regâi de unitât e de pâs.
Lui ch'al vîf e al regne tai secui dai secui.

Prefazi: Crist re dal mont intîr.

V. Il Signôr cun vualtris.

R. E ancje cun te.

V. Adalt i cûrs.

R. Ju vin viers il Signôr.

V. Vin agrât al Signôr nestri Diu.

R. Al è just a al va ben.

Al è propit just e sacrosant, al covente e al da salvece
vêti agrât simpri e dapardut,
Signôr, Pari sant, Diu onipotent e eterni:

Tu cun vueli di gjonde tu âs consacrât
Predi par simpri e Re dal mont intîr
il to Fi Unigjenit,
Gjesù Crist nestri Signôr.
Lui, sacrificantsi sul altâr de crôs

tant che vitime immacolade di pâs,
al à operât il misteri de redenzion umane,
e, daspò di vê metudis sot de sô paronance dutis lis creaturis,
i à ufiert a la tô maiestât infinide
il so ream eterni e universâl:
ream di veretât e di vite,
ream di santitât e di gracie,
ream di justizie, di amôr e di pâs.

Par chel, cui Agnui e cui Arcagnui,
cui Tronos e cu lis Dominazions,
e cun dute la sdrume de schirie dal cîl,
o din sù la cjante de tô glorie,
disint cence polse:

Sant, Sant, Sant al è il Signôr Diu di dut il mont...

Antifone a la comunion Sal 28,10-11

Si è sentât il Signôr re par simpri:
al benedissarà il so popul cu la pâs.

Daspò de comunion

Daspò di vê spartît il pan de immortalitât,
ti prein, Signôr,
di tignîsi in bon di ubidî ai comandaments di Crist, Re dal mont intîr,
par podê vivi par simpri cun lui tal ream dal cîl.
Lui ch'al vîf e al regne tai secui dai secui.

SOLENITÂT DI N.S.G.C. RE DAL MONT INTÎR

PRIME LETURE

A onzerin David re di Israel.

Dal secont libri di Samuel

5,1-3

In chei dîs, ¹dutis lis tribûs di Israel si presentarin di David a Ebron e i diserin: «Cjale mo: nô o sin part dai tiei vues e de tô cjar. ²Timp indaûr, cuant che Saul al regnave sore di nô, tu jeris tu che tu menavis fûr e dentri Israel, e il Signôr ti à dit: Tu tu passarâs il gno popul Israel e tu deventarâs sorestant di Israel». ³Ducj i anzians di Israel a lerin dongje di David a Ebron e il re David al fasè un pat cun lôr a Ebron presince dal Signôr, e lôr a onzerin David re di Israel.
Peraule di Diu.

SALM RESPONSORIÂL

Dal Salm 121

R. E regne la pâs là ch'al regne il Signôr.

Ce ligrie cuant che mi an dite:

«O larin te cjase dal Signôr».

²I nestrîs pîts bielzà si cjatin,

Gjerusalem, dentri des tôs quartis! R.

³Gjerusalem ch'e je stade fate

come une citât ben vuaiade.

⁴Lassù lis tribûs a levin,

lis tribûs dal Signôr,
seont la leç che Israel al à vude
di laudâ lassù il non dal Signôr. R.

⁵Lassù a son prontadis lis sentis de justizie,
lis sentis de cjase di David.

⁶Bramait la pâs a Gjerusalem:
chei che ti vuelin ben ch'a vedin furtune! R.

SECONDE LETURE

Nus à trasferîts tal ream dal so cjâr Fi.

De letare di san Pauli apuestul ai Colossês
1,12-20

¹²Fradis, ringraziin cun gjonde il Pari che nus à metûts
in grât di partecipâ al distin dai sants inte lûs.

¹³Lui nus à gjavâts fûr
de paronance dal scûr

e nus à trasferîts
tal ream dal so cjâr Fi,

¹⁴che in lui o vin la redenzie,
il perdon dai pecjâts.

¹⁵Lui al è il litrat dal Diu invisibil,
il Fi primarûl di dute la creazion,

¹⁶parcè che in lui
a son stadis creadis dutis lis robis
tai cî e su la tiere,
chês visibilis e chês invisibilis:

Tronos, Dominazions,
Principâts e Potencis.

Dutis lis robis a son stadis creadis
midiant di lui e par lui;

¹⁷e lui al esist prin di duçj lôr
e duçj a stan sù in lui.

¹⁸Lui al è ancje il cjâf dal cuarp, ven a stâi de Glesie;
lui al è il principi, il Fi primarûl
dai resussitâts,

in mût di jessi il prin in dut,

¹⁹parcè che in lui e à vût gust
di stâ dute la plenece

²⁰e di riconciliâsi, midiant di lui, dutis lis robis
de tiere e dal cîl, fasint la pâs
midiant dal sanc de sô crôs.

Peraule di Diu.

CJANT AL VANZELI

Cfr. Mc 11,10

R. Aleluia, aleluia.

Benedetchel ch'al ven tal non dal Signôr!

Benedet il so ream ch'al sta rivant.

R. Aleluia.

VANZELI

Signôr, impensiti di me cuant che tu vignarâs tal to ream.

Dal vanzeli seont Luche

23,35-43

³⁵In chê volte, il popul al stave a cjalâ. I sorestants dal popul invezit a svilanavin Gjesù disint: «Al à salvât chei altris, che si salvi se s'al è il Crist di Diu, l'elet». ³⁶Ancje i soldâts lu svilanavin; i levin dongje par dâi asêt ³⁷e i disevin: «Se tu sês il re dai gjudeos, salviti!». ³⁸Parsore dal so cjâf e jere ancje une scrite: Chel chi al è il re dai gjudeos.

³⁹Un dai delincuents ch'a jerin stâts metûts in crôs lu ofindeve: «No sêstu tu il Crist? Salviti te e ancje nô!». ⁴⁰Ma chel altri lu corezeve: «No âstu propit nissun timôr di Diu, tu che tu stâs paiant la stesse condane? ⁴¹Par nô e je juste, parcè che o cjapìn la pene mertade cu lis nestriz azions, ma lui invezit nol à fat nuie di mâl». ⁴²Po al zontà: «Gjesù, impensiti di me cuant che tu vignarâs tal to ream».

⁴³Gjesù i rispuindè: «Tal dîs in veretât: vuê tu sarâs cun me in paradîs».

Peraule dal Signôr.